

Petersen Dyggve

I.

Ne me sont pas achoison de chanter
prey ne vergier, plaisséiz ne boisson;
quant ma dame le plait a comander,
n'i puis avoir plus avenant raison.
por ce m'est bon que sa valor retraie,
sa cortoisie et sa beauté veraie,
dont Dex li vot si grant planté doner
qu'il en estuet les autres oblïer.

II.

Et nonporquant, mout dout l'emprison
qu'ai en mon cuer faite de li amer.
Bien sai de voir qu'anbedui en morron,
mais nus ne doit si bele mort douter.
De ce me vant qu'autres senz me desvoie
tres granz amors, qui m'enseingne tel voie
qu'a mon voloir moi et mon cuer tendron,
mais, par mon chief, ja n'en retorneron.

III.

Ja ne porrai ma grant joie achever,
morir m'estuet en lieu de guierredon.
Soëf trait mal qui en cuide eschaper:
beaus conforz est d'atendre garison.
Mais sanz espoir me tormente et esmaie
iceste amors qui m'ocit et apaie;
Merci me fait en ma dame cuider
tel que Raisons n'oseroit creanter.

IV.

Biens et beautez sont en li compaignon,
sens et valors les i fist assamblar;
et cil qui voit son cors et sa façon,
quant plus a sens, plus i covient penser.
Quant ainz la vi, bien soi que j'en morroie:
plus m'ocirroït, quant je plus la verroie,
mis granz desirs par si bele achoison,
dont ja n'avrai sanz joie reançon.

V.

Touz jors cuidai ceste dolor celer,

que nou seüst la bele o le douz non,
n'el nou savra. qui li doit donc conter
quant nuns ne set m'angoisse se je non?
Dit ai que fox: ja nuns hons qui la voie
si nices n'est que bien ne saiche et croie
que j'aing cele que tant m'oez loer,
a ce qu'ele est bele et bone sanz per.

VI.

Fins amorous, touz jors di et diroie
nuns n'est amis qui contre Amor guerroie:
puis qu'ele vuet dedans son cuer entrer,
vers sa vertu ne puet sens foisoner.

VII.

Peires amis, quel que mail que j'an traie,
nule achoisun d'amer ne mi delaie.
[...].

- letto 331 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/petersen-dyggve-52>